



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

**Kiralongrartem mechioktsü, onoka mainshitsü: Israel PM**

**National Open Race Walking: Manju-i 10km asaya nung gold angu**



VOL. XXI ISSUE NO. 109 (ADOK 109) DIMAPUR

YANGTEPNÜ (THURSDAY)

TSÜKLAI (FEBRUARY) 01, ₹ 5.00

## PM Modi-i semdangtsü aliba atema Assam renemshir

**Guwahati, January 31, 2024 (Agencies):** Prime Minister Narendra Modi-i February 3 nü Assam semdangtsü atema Chief Minister Himanta Biswa Sarma-i senden balala menogo.

Dispur nung aliba Lok Sewa Bhawan nung CM Sarma-i PM Modi dak sendakba maparen ajak meyipa reprangshi. Sendentem nung Sarma-i ketdangsur ajak dang PM Modi-i semdangba maparen takok angutsü atema inyaksü tetuyuba agütsü.

State sorkari Prime Minister

dang Assam semdangtsü jaokba pelashishia agizükogo ta CM Sarma-isa ashi.

February 3 aser 4 anogotem PM Modi-i Guwahati semdangtsü aser iba mapang Rs 11,000 crore tema alangba mapa kar lapoktsütsü aser welfare mapa aika indang lung azüngtsütsü.

Prime Minister Modi-i taküm mezüng atema Assam semdangtsü. Nisung aikati iba mapang PM Modi-i Assam nung BJP atema Lok Sabha elections yimym ayimoktsütsü imlar.

## Manipur: Naga nung 2 pur züka merenshi

**Imphal, January 31, 2024 (Agencies):** Manipur kübok Noney district nung alir Zeliangrong Naga nung ana pur orr Bishnupur district kübok Moirang nung kanga mejungi züka merenshi.

Iba tatalokba ya Zeliangrong Students' Union Manipur (ZSUM) aser Federation of Civil Society Organisations (FOCS) ajanga khukhua aitsüogo.

Arambai Tenggol züngsem 6-i Giangjilung Rongmei (38) aser Jeanguanglung Malangmei (28) na prangpong agi tui ter anir ao ta ZSUM-i ashi.

Hombar nikongdang 5:00 ako meta tena pur orr züka merenshi aser tena Kuki nung ta tai tongloksü. Tena apurtemi Rs 21,000 dena Rs 2 lakh shi alang senti osettem auya.

Kamjong district nung mejangjatetba nisung kari arishi küm 19 tain kaketshir pur aoba sülen Manipur police-i Imphal West nung kümzükba kasa anogo

nung iba lendong atalok.

"Sorkar dang iba tatalokba bushisüngdangtsü mepishiaka telangzüba tajung kecha manguba atema jashir. Onoki joko ibala mapa magizüker" ta ZSUM-isa metetdaksü.

"Onoki sorkar aser bangdakpurtem dang aiben mepishiago saka telangzüba tajung kecha mali. Onok kümzüka ayutsü atema mapa kar inyaksüsa akümer. Manipur nung ozüng melii akümba ajanga kin balala lemsatsüsa akümtsü" ta parnokisa ashi.

ZSUM-isa Naga Civil Society Organizations (CSOs) aser Naga nung dang iba tatalokba anema noktaksü ayongzükogo.

Rongmei Naga nung nisung ana dak teka sangshiba atema tebilemtsü abener. Local clubs, Meira Paibis aser CSOs-i pei pei volunteers nem shisatsü agütsütsü aser tarutsü nung ibala tatalokba nungi jenbua alitsü osang prokshitsüla ta FOCS-isa metetdaksü.

## Assam Congress president dang asüngdangya

**Jorhat, January 31, 2024 (Agencies):** Assam Pradesh Congress Committee (APCC) president Bhupen Borah-i Jorhat police den ajurutepogo.

Rahul Gandhi-i anir agiba Bharat Jodo Nyay Yatra mapang lenmang melenshiba anema ken o benoka aliba dak sendakba nung police-i Borah dang asüngdangyatsü atema jaok.

Tanü pa Jorhat Police Station-i ao aser idakji pa dang ghonda asem shi asüngdangya asü. Iba mapang CLP leader Debabarata Saikia, Titabor MLA Bhaskar Jyoti Baruah, lawyer telok ka aser Congress züngsem aikati Borah meiner ao. Pa apu nunga anticipatory bail memeshitsü ta Borah-i jelia shia lir.

Tanü Borah dang asüngdangya asüba sülen ano February 12 nü police dangi arutsü pa jaokogo.

"Ni tanep 11:00 ako nung police tsüngdang noktak. Ketdangsur pezüi ghonda asem tashi kü dang asüngdangya.

Parnoki ni ano February 12 nü arutsü jaok aser ni mulunga agizükogo" ta Borah-i ashi.

Jorhat jila tonga aodang police shingia Nyay Yatra atema lenmang melenshiba osang mashi.

"January 18 nikongdang 4:00 ako nung onok Jorhat atongdang onoki police mangu. Tanübo parnok civil dress nung liasü ta police-i ashi. Parnoki tensaji azüoktsüba asü aser lenmang noktangtsüba liasü" ta Borah-i ashi.

"Tanü parnoki (police) Yatra indang video ka sayu. Idangji ni police kong lir ta asüngdang. Uniform asema police ana dang angur. Onok dang police tem civil dress nung lir ta ashitsüla aser parnok onok len anitsüla. Onoki DGP den ajurutep aser ketdangpurtem dang nungi temelaba meshi anungji parnoki aibelenogo" ta paisa ashi.

Assam Congress president Borah-isa Yatra mapang pa dak teka sangshir dak mapa meinyakba atema asüngdang.

## Mega Job Expo 2024 kanga dang tajangzük nung agir tembangogo



Fazl Ali College Mokochung nung Mega Job Expo 2024 sentong akaba mapang Naga nung talisa lanurtemi yanglutetba osettsüset aser chiyungtsü renemtetbatem ayokba noksa nung angur.

**Mokochung, January/**

**Aenjeti 31 (TYO):** Mokochung District Planning & Development Board (DPDB) aser ano District Skill Committee telok ana ya semteper Fazl Ali College Mokochung nung January 30 nungi January 31 nü tashi Naga nung zünger mapa mongui alirtem nem mapa nung anioktsütsü asoshi "Mega Job Expo 2024" akaba sentong tanu kanga dang tajangzük nung agir tembangogo.

Mokochung District Planning and Development Board aser District Skill Committee-i iba Mega Job Expo sentong ayonga akaba ya amajok makümtsü, iba sentong akaba ajanga lanurtem aika tenük lapoktsü tamang tulu lir ta iba Mega Job Expo secretary Planning committee Er. Imlisunep Ao-i lemsatop.

Mapa agütsütsü asoshi Job Partners aika dang lir, saka kanga dang tesasatsü item Job Partners-temi inyaktetsütsüpa mapa nung temsüa inyaktetsütsüpa aika monguteter, anungji asenoki asen chirnurtem tazüngba tsütsülen dang takok ngudaktsütsü asoshi masü saka lenla ajak nung temsüa anitetsü kanga dang nungtaker ta pai ashi.

Er. Imlisunep-isa asen Naga lima nung züngteter mapa mongutetba shisabulu ajema akumetsü aser lanur tejakleni aniteta asen lima renloka oatsü asoshi iba ama sentong ya mapang shia ayonga akatsü kanga dang tongtipang ta ashi.

Mokochung District Planning & Development Board (DPDB) ajanga iba Mega Job Expo sentong ayongtsü renemer District Skill Committee den semtepa iba sentong ayongba

ajanga Naga nung lanur zünger alir mapa aginer 1500 temai iba sentong ajanga tajangzük agitsü aser item 1500 tema rongnung Mokochung district kija nungi dang masü saka Shamator district nungi 45 aser Mon district nungi 35 ta aruagi iba sentong ajanga temoatsü agiogo.

January 30 anogo iba Mega Job Expo 2024 sentong tenzükba sentong nung Japan nung Takumi Ishiwatari shiba Dimapur nung lia Japanese Teacher, Nagaland Arms Center nung inyaker pai par Japan lima nung mapa inyaka litetsü asoshi lenmang aliba lemsatopa liasü.

Mega Job Expo 2024 nung Job partners International partner-1, outside state nungi-3 aser Nagaland state aser Mokochung district nungi 24 ta nung lanurtem mapa inyaktü maongka nguogo.

## ED-i Hemant Soren puogo; Champai Soren-i Jharkhand CM inyaksü

**New Delhi, January 31, 2024 (Agencies):** Bodbar nikongdang Enforcement Directorate-i Jharkhand Chief Minister Hemant Soren puogo.

Soren-i Chief Minister menden toktsüba sülen minute ishika dang lir ED ketdangsurtemi pa apu.

Jharkhand Mukti Morcha nungi lennir tejen aser tang teinyakdak Transport minister Champai Soren-i chief minister inyaksü.

Ali nung tim masüba ken o dak sendakba nung Hemant Soren apu. Iba ya masü dang pai Governor den ajurutepa Chief Minister menden nungi sodi agiba shidi agüja liasü.

Hemant Soren-i Chief Minister menden nungi aluba sülen pai ang arrest memo nung sign asütsü ta ketdangsurtem dang ashi.

Rs 600 crore ali maparen ka nung sen tim mesüi amshiba atema ED-i Soren dang asüngdangyatsü jaoka liasü saka pai tenetben tashi mao.

Yashi pai Jharkhand MLA tem

den senden ka amen aser idangji pa melenzüktsü nübo atema jembitep.

Mezüng nungbo pa kinungtsü Kalpana Soren-i chief minister inyaksü ta jembia liasü saka taküm November ita assembly election agitsü aliba ajanga Jharkhand Mukti Morcha-i iba tebilemba agien.

State assembly kümsük tembangba küm by-elections agitsü makok anungji Kalpana Soren-i Chief Minister inyakaka la MLA ka akümtsü atema by-election magitetsü mapang ka ajuru.

"Onoki Legislative Party leader asütsü atema Champai Soren shimogo. Onoki Governor dang tezüngzüktep agitsü mepishitsü atema Raj Bhawan-i aru" ta Jharkhand minister Banna Gupta-i osangbener dang ashi.

"CM Hemant Soren-i menden toktsütsü lemtetogo. Legislative party nung leader asütsü atema Champai Soren shimogo. MLA ajak onok den lir" ta Congress MLA Rajesh Thakur-ia ashi.

Jharkhand state balaka

kümtetsü atema inyakba mapa nung Champai Soren-ia shilem agia liasü.

Tanü anüngdang Ranchi nung ED ketdangsurtemi Soren dang asüngdangya asütsü tenzükba sülen par ki meketa security akangshi aser Section 144 benok. Jharkhand Mukti Morcha züngsemtemi ED anema lungkak ait.

"Chief minister-i amalitep liaka pa nem timtem agütsür. January 20 nü pa ED tasüngdangbatem langzüogo saka hopta ka tsüngda pa jaok. Iba ya pa aser sorkar tenüng menüktsütsü atema inyakba mapa ka lir" ta JMM pusemer kati ashi.

Hombarnü ED ketdangsurtemi Delhi nung par ki mita reprangba anema Hemant Soren-ia ED ketdangsurtem anema FIR ka benoka lir.

"ED tongti ketdangsur kar anema FIR benokogo. Onok dangi chief minister nungi application aruogo" ta Ranchi Senior Superintendent of Police Chandan Kumar Sinha-i ashi.

# US Consulate General-i anir tzü mopong indang jemb



**Kolkata, Jan.31 (TYO) :** U.S. Consulate General, Kolkata aser Prodigal's Home, Dimapur na külem ser BRIDGE, Bhutan Ecological Society (BES), Bangladesh Youth Environment Initiative (BYEI) aser PlaceMaking Foundation, Manipur nungertem ayongsemer alima nung tzü mopong meraksadaksüi shitak ayutsü atema teinyaktsütem shisalemsatepba sentong ka yashi January 30 nü USA Pavilion, International Kolkata Book Fair, Karunamoyee, Salt Lake, Kolkata agiogo.

Ibai Young Unheard Voices for Action (YUVA) On Climate Change tenüing nung ayongzükba sentong tatembangba liasü. Iba sentong nung American Center, Kolkata nung Deputy Director Juan Clar, YUVA nung Project Director Imliben Lemtur aser Bridge nung Director Prithviraj nungertemi iba sentong nükjidong indang lemsatepba liasü. Iba sentong nung alima tzü mopong kümzüka ayutsü inyaker mongintem den India, Bangladesh aser Bhutan nungi lanurtem teshimtet kar nem

shilem agidakja shisalemsatepdakja liasü. Iba sentong ajanga alima nung lanurtem ajurutepdakja tzü mopong kümzüka ayutsü atema tebilemba lemsatepa mapa küma inyaka aotsü nükjidong lir. Iba sentong nung electronics osettem aser plastic tejentem meindoki tanaben amshitetsüsa yanglutsü indang maparen angazüker aser tzü wazüka ayutsü, alu tajungba ayimtsü aser asen sobaliba inyakyim ajanga raliwalirtem lima kümdaktsütsü atema shisalen sayuogo.

# Bengaluru nung INDIWOOD 2024 sentong agitsü



**Dimapur, Aenjeti/January 31 (TYO):** Woodworking and Furniture Production Technologies sayuba sentong ka February 22-26, 2024 anogotem 13 buba INDIWOOD mapang agitsü, koba Bangalore International Exhibition Centre, Bengaluru nung alitsü. Iba sentong nung linük 50 dak tema nungi company 950 dak temai shilem agitsü, kong trade visitors 75,000 dak tema alitsü. Iba sentong nungya technology tasenba sayutsü aser tesendaktep balala agütsütsü. Iba sentong nung alima tesem balala nungi industry leaders, technology suppliers aser talirtem adenshitsu, kong

seminar, workshops aser panel discuccions tem alitsü. INDIWOOD sentong nungya Machinery & Technology tasentem, Materials & Supplies, Fittings, Hardware & Components aser Industry Services balala angutsü. Kasa mapang India Mattresstech & Upholstery Supplies Expo, Wood+ in Architecture & Design and Surface in Motion India amala sentonga alitsü. Linük tesem ajungalen nungi arem nungi adokba osettem permit ka ajanga prokshitsu asoshi Government of India-i tawa National Transit Pass System (NTPS) semzükogo aser iba ya ajanga 'ease of doing

business' nung yaritsü. Maneni arem wazüka ketdangtsütsü aser agroforestry practices "PRAMAN" atema Forest & Wood Certification Scheme yagi India nung süng agi osettsüset balala yangluba bendang lima nung bener oa ayoktsü maongka tali agütsütsü. Iba sentong nungya Nepal, Bhutan, Sri Lanka, Middle East aser danga linüktem nungi Furniture & Kitchen manufacturers, architects, interior designers, timber traders, saw millers, builders, contractors, hardware distributors, dealers tem arua shilem agitsü. Germany, Italy, France, Malaysia, USA, Turkey linüktem nungia official pavilions ajanga shilem agitsü. February 24 nü 3 buba 'Wood+ in Architecture and Design (WAD)', anogo ka mungdang alidang Architects, Structural Engineers, Designers aser Mass-Timber manufacturers adenshia panel discussion alitsü.

# Longleng nung NRB branch ka semzük

**Dimapur, Aenjeti/January 31 (TYO):** Deputy Commissioner Longleng, Dharam Raj, IAS ajanga January 30, 2024 nü Nagaland Rural Bank Sakshi Branch Longleng semzüksü aser ATM van ka flagged off süja liasü. Iba sentong nung Deputy Commissioner ajanga jembidang bank ya kanga tongtimbang lir aser anogoshi takum libaliru nung nüngdaker ta ashi. Pai nüburtem dang iba facility tajungtiba nung amshitsu ayongzüka liasü. Nüburtem temaba jenjangi ajungkettsü

asoshi nüburtem aser bank yaritepa alitsü nüngdaker, ta pai ashi. Iba sentong nung Sakshi Association tir, Esham Phom-i pela agizükba o jembia aser Yimchong Women ajanga sobaliba ken ka aten. Chairman, Nagaland Rural Bank, V. Venkata Narayan-i salem o shiokba angadakja liasü aser Branch manager NRB, Sakshi, Nilopu Zhimomi ajanga melepzüng o jembia liasü. Iba sentong nung sorkar ketdangsür aser lokti tentet balala nungi lenirtem arua dena liasü.

# IPR Department-i Commissioner & Secretary den tepila sentong agi



**Dimapur, Aenjeti/January 31 (TYO):** Information & Public Relations (IPR) indang Commissioner & Secretary, V. Maria Yanthan, IAS den tepila sentong ka la indang office chamber, Nagaland Civil Secretariat, Kohima nung January 31, 2024 nü agia liasü. Maria Yanthan-i iba sentong nung jembidang, lai Nagaland sorkar tajungtiba nung bendanga agütsür tenzüka aruogo ta ashi aser sorkar tenzüker ajunga dang pai mapa ochishia inyaktsü ajungshia liasü. Laisa mapa inyakba mapang 'office decorum' shidak amshitsu ajungshia liasü. Secretariat aser Directorate nung aliba ketdangsür aser staff

temi yaritepba asoshi lai pelaba lemsatepa liasü. Joint Secretary IPR, Kusa Fithu-i IPR indang officers aser staff tem tenüing nung jembidang Maria Yanthan nem tenüingsang agütsü aser tarutsü asoshia moaja liasü. Department asoshi lai mapa tajung inyakba teti bilemtetsü, ta laisa ashi. Director IPR, DzüvinuoTheinuop-i iba sentong nung o tatsüka jembidang, takum tajung nung Commissioner & Secretary menden nungi aliba ya takok tulu lir, ta ashi. Iba sentong nung Deputy Secretary, Information & Public Relations, Peter Chawang menden liasü aser paisa pela agizükba o jembia liasü.

# Assam Rifles-i sentong balala ayongzüka agi



**Dimapur, Aenjeti/January 31 (TYO):** Assam Rifles temi Civic Action Programme kübok Care and Support (Orphanage) Home, Chungtia, Mokokchung yanglushitsüba mapa inyaka liasü. Iba mapang parnoki takdang pezü nung electrical fittings, atem, kilem aser danga tesentem yanglushija liasü. Iba orphanage home nungya tang tanur 38 telidak aser Assam Rifles temi mapa tajung inyaktsüba ajanga tanurtem kanga ajanzüksütsü. Assam Rifles temi mapa

tajung inyakba atema yangji aliba tanurtem, tesayurtem aser ketdangsürtemi pelaba lemsatepa liasü. Maneni Assam Rifles temi Shamatore nung aliba tanurtem asoshi Educational Tour ayongzüksür anogo ana jungogo aser parnoki Mokokchung nungi Assam kübok Jorhat tashinung tongtipang tesentem semdanga jajar. Bodhbarnü parnoki Impur semdang aser iba sü;len Jorhat nung Assam Rifles Dog Unit semdanga liasü.

**Omen: "Saisabong Ajanga Yimjung"**  
**Saisabong Lapoktsür :**  
**S. N. Meren,**  
**Retired Chief Engineer**  
 Anogo : 23<sup>rd</sup> January 2024 Mapang : 9:00 AM  
 Tesentepdak : Ngurtembang Ground,  
**Tetushi Tejaoker : Wb. S.C. Toshi Imsong**  
**Taoba YKT Tir**  
 Anogo : 23<sup>rd</sup> January 2024 Mapang : 4:00  
 Tesentepdak : Changtongya Baptist Church

Anogo 23rd January 2024, "Saisabong Ajanga Yimjung" Omen nung ajemdaker 4 buba Yaongyimsen Kaketshir Telongjem aser Changtongya Kaketshir Telongjem yimjung benjongmong takok ngua amongba lemsateper.



New Delhi, January 31, 2024: Bodhbarnü Parliament nung budget senden tenzükba anogo nung Ato kilonser, Narendra Modi-i osangbenertem den jembitsü lia tangokba noksa nung angur.

### State aikati Israel nung mapa inyaksü atema aayanger shimtsü mepishir

**New Delhi, Aenjeti/January 31 (Agencies):** Israel nung kisü-jensüba mapa inyaksü atema Uttar Pradesh aser Haryana na nungi nisung meyrjang aika shimteta sülen ano state pongu- Mizoram, Telangana, Rajasthan, Bihar aser Himachal Pradesh state temia Centre sorkar dang Israel nung mapa inyaksü atema parnok state tem nungia aayangertem shimang, ta mepishiogo.

Uttar Pradesh nungi nisung 7,182 aser Haryana nungi nisung 1,370-i tenüng agiija liasü; anogo tenetnü tashi shimba maparen inyakba sülen iba nungjagi Uttar Pradesh nung nisung 5,087 aser Haryana nungi nisung 530 shimogo.

Osang angazükba agi, India nungi nisung 5,000-i kum pongu tashi Israel nung mapa inyakra sen crore 5,000 shi India-i arutsü.

Tang Gaza nung Israel sepaitemi Hamas telok den raraba mapang ka nung Israel nung aliba construction industry nung aayanger nübo agi kanga anünger; ibayongji Israel Ato kilonser, Benjamin Netanyahu-i aniba sorkari India dang teyari meshia liasü.

Israel aser Hamas na tsünga rara tenzükba sülen Israel-i par linük nung mapa inyaker Palestine nung mapa inyaker 'permit' agienogo, aser tang Israel-i India nung mapa inyakerterem aser aayangertem nübo bushir.

Chief Operating Officer NSDC International, Ajay Kumar Raina-i, "India nungi kisü-jensü mapa inyaker nisung 10,000 shimtsü atema India aser Israel sorkar na tsünga tezüngzüktep ka agia lir. Onoki state ajak nem iba osangji

metetdaksü, ajisüaka Haryana aser Uttar Pradesh nati tama telanzüba agüja liasü," ta metetdaksü.

"Iba maparen nungita National Skill Development Corporation (NSDC)-i temeja office ka lapoka teyari agütsür. Iba tezüngzüktep takok ngua inyaktetsü atema onoki inyaker, koba ajanga linük anaprongla tajangzük angutsü," ta Raina-isa metetdaksü.

Israel nung mapa inyaksü janrarterem medical test agiba den police clearance, visa aser passport verification agiba sülen anogo 30 tsünga Israel-i yoktsü.

Israel nung mapa inyakerterem nem itasen sen lakh 1.37 tashi agütsütsü, medical insurance, chiyungtsü, talidak aser ita shia bonus sen 16,515 agütsütsü.

Yaküm May ita nunga Israel nung inyaksü atema India nung kisüjensürtem aser nurse 42,000 yoktsü atema tezüngzüktep ka agia liasü.

### Hemant Soren-i ED kettangsertem anema ken o benok

**New Delhi, January 31 (Agencies):** Enforcement Directorate (ED) kettangsertemi Jharkhand chief minister, Hemant Soren'er ki Delhi nung mita repringba anema Bodhbarnü pai Ranchi nung SC/ST Act kübok ED kettangsertem anema ken o ka benokogo.

asüngdangyatsü atema Delhi nung par ki mita ao, ajisüaka iba mapang nungji pa kidang maliasü.

ED kettangsertemji par kidang ghonda 13 liasü aser ki mita repringba mapang nung sen lakh 36 den tashishitsü aketba documents kar aser gari ka apu.

Jharkhand chief minister Hemant Soren-i FIR nungji ED kettangsertem pongu tenüng

tetshia lir aser parnok rongnung Kapil Raj aser investigating officer Deovrat Jha na densema lir.

Hemant Soren-i, January 27-28 anogotem nung pa Delhi nung aliba par kidang liasü, aser ED-i apuba BMW SUV gariji pa meyong masü, ta metetdaksü.

Soren-isa, ED-i par ki mita bushisüngdangtsü atema pa nem jelia osang memetdaksü, ta ashi.



January 31, 2024 nü Chhattisgarh Chief Minister, Vishnu Deo Sai-i Maoists telungpurtemi kshetba sepaitem nem akhüm agütsüdang tangokba noksa nung angur. Mongolbarnü Bijapur district nung telungpurtem den khatepdang CRPF sepai asem asü aser 15 yirua liasü.

### Parliament amakertem Police-i reshikangshi

**New Delhi, January 31 (Agencies):** Yaküm kum tatembanglen Parliament nung security raksaba ken o dak sendakba nung nisung trok pua lir; nisung trok nungjagi nisung ponguibo Delhi police-i parnok reshikangshiogo, ta court nem metetdaksü.

court-i Delhi police dang telanzüba agüjang ta tuyuogo aser maneni February 17 nü court-i ken o angadangtsü.

Bodhbarnü nisung pongu jagi court dang, Delhi Police-i parnok dang 'parnok opposition party tem den tesendaktep lir' ta nangzükang, ta shia parnok reshikangshiogo; police-i parnok electric current agia pudakja reshikangshi, ta metetdaksü.

2001 kum Parliament amakba anogomong nung (December 13) asükwa mongpu Parliament senden tagidak mapang nung nisung ana- Sagar Sharma aser Manoranjan D na public gallery nungi Lok Sabha chamber-i pungzuka aluba sülen ayimdena pongdang kar nungi mokozi chioka liasü; ibaji ajanga MP tem kanga aoksatepa liasü.

Nisung pongu jagi Additional Sessions Judge, Hardeep Kaur nem ibaji metetdaksüba sülen maneni March 1 tashi parnok trokprongla judicial nung ayutsü metetdaksü.

Kasa mapang nungjisa Amol Shinde aser Neelam Azad natia Parliament kima pongdang nungi mokozi chioka liasü.

Nisung pongu- Manoranjan D, Sagar Sharma, Lalit Jha, Amol Shinde aser Mahesh Kumawat nungeri court dang, Delhi police-i parnok nem shidi tazünga 70 nung kangshia sign südaksü, ta metetdaksü.

Parliament nung security raksaba sülen opposition MP temi senden nung iba onük benoka o lemteptsü akhangba den külemi Union Home Minister, Amit Shah dang Parliament-i arua telanzüba agüjang, ta longkak aitba agi senden nung aiben rongrong adoka Lok Sabha Speaker aser Rajya Sabha Chairman nati opposition züngsem aika anenja liasü.

Neelam Azad-ibo court dang kuli kecha mashi.

Senden nung timtem agütsüba atema opposition MP ajak senteper 146 anenja liasü.

Indian Penal Code aser UAPA kübok parnok anema ken o benoka lir.

Iba dak sendakba nung



New Delhi, January 31, 2024: Bodhbarnü Parliament nung budget senden tenzükba anogo nung Shiv Sena (UBT) MP, Priyanka Chaturvedi-i osangbenertem den jembidang tangokba noksa nung angur.

### Corruption Perception Index (CPI) nung India jenjang 93buba nung lir

**Mumbai, Aenjeti/January 31 (Agencies):** Alima nung linük 180 nung ochimashiba jenjang asadanga Corruption Perception Index (CPI), 2023 nung India jenjang 93buba nung lir; kasa jenjang nung Maldives, Kazakhstan aser Lesotho linüktema lir.

Syria, South Sudan aser Yemen linüktem densema lir. Item linüktem nung timtem balala lir aser item linük teimbaka nung civil war lir.

CPI report ya Mongolbarnü Transparency International-i saya.

Taoba CPI-2022 nung India score 40 liasü saka takümbo score 39 dang angu.

2022 kum CPI nung India jenjang 85buba nung liasü.

Transparency International teloki ashiba agi, CPI-2023 ajanga linük teimbakati public sector nung ochimashi menokdangtetba sayur. Ano alima nung CPI average score taküm agi kum 12ben tashi score 43 dang lir aser linük 180 nungi linük 120 dak temabo score 50 den tekübokba lir.

Linük 180 nung public sector nung ochimashiba asadanga kum shia CPI report sangdonger. Iba index nung score 0 (tazünga) angurtemji kanga ochimashiba linüktem aser score 100 tashi angurtemji kanga ochimashiba linüktem lir.

Asia-Pacific region nung kum pongu tashi average CPI score ji 45 dang lir saka India bo average score dang nungjagia ishiba (score 39). Asia-Pacific region nung aliba linüktem sasep nung New Zealand-i score 85 angu, Singapore-i score 83 aser Australia-i score 75 angu.

CPI-2023 nung temaba jenjangji Denmark lir; parnoki score 90 angu; tanabuba aser tasembuba jenjangji Finland (score 87) aser New Zealand (score 85) nati angu.

India kidanger linük ana- Pakistan-i score 29 aser China-i score 42 angu.

Ochimeshitiba linükji Somalia liasü; jenjang tamajungtiba linüktem rongnung Venezuela,



## TIR YIMYIM YIMOBILEM (EDITORIAL)

DIMAPUR YANGTEPNÜ, FENRUARY (TSÜKLAI) 01, 2024

### Mapa inyaksü renemdi

Tanü asüng asenok rongnung 'skill' aser 'skilling' nüngdakba indang kanga jembir, kechiyong mapa inyaktetsü atema 'skill' nüngdaker. Atangji, o junga jembitetbajia 'skill' lir saka shitakba 'skill' jibo tebang agi jembiba o ji teka agi mapa küma inyakbaji asütsü. Anungji, 'Skill' tetezü mapa inyaksü akokba mesüra metetba ta angatetsü junger. Kasaji, "Skilling" tetezü mapa inyaksü sayuba aser angazükba ta angatetdi. Atangji, iba English ojang ya asenoki mangatet masü saka angatetter mapa küma meinyakba agi asenok kangshir. Item ajakji tanü taintemi lanurtem nem tai tongloktsür, kechiyong lanurtem aikati mapa kecha inyak mashiba agi mapa inyaksü mangu taküm aliba amajok kümdaktsür. Ajisüaka, lanurtemi mapa inyak mashibaji parnok tai masü kibong nung tsürabur aser kaketreju nung sayuyim (education system) tai asütsü. Akhi tsürabur mapang kaketreju lapoka zülutsü aser azüngtsü memetet aser mesayuba mapangbo pei ki aser kibongji tanurtem asoshi 'school' liasü. Iba ki school nungji tsüraburtemi soruchioktsü (cooking class) sayu, ki aoktsü, nok, alulem aser mertsüng amshitsü sayu. Aji oda, tsüraburtemi tanurtem den külemi alu inyaka aluyimtsü aser kisüjensütsü sayu. Anungji, tanurtem tain küma kibong akümdangbo taküm lia aotsü atema inyaksüba mapatem ajak inyakteta kümer liasü. Tanü iba tsürabur mapang denji asen putu medemdangra, asenokbo kaketshisatsü aruba agi mapa inyaksü angazük masü, mapa meinyaki chiajema taküm alitsü angazük amai, züngerbo mapa meinyakner. Ibaji asen lima nung kaketreju lapokba mapang tsüraburtemi tanurtem nem tai tangatetba agütsüba ajanga tanü tashi iba tai tesayuba aser tangatetbaji lanurtem kolok aser shisatsü nungi moar. Aji oda, tanü tashi tsüraburtemi tanurtem dang alu mapa inyaka melinüra school meranga zügang ta ajungshir. Tetezü, teka mapa inyaka melinüra school junga zünger office nung pen aser computer amshia mapa inyaka alitsüsa school meranga zügang ta ashirba asütsü. Aji shitak amai saka asenok tanü tebilemetsüji yang nung jagi tenzüker, kechiyong alu meyimnüra mesüra mapa meinyaknüra school meranga zügang ta ajungshiba tetezüji mapa meinyaki ita sen chia linüra meranga zügang ta ajungshir, anungji iba amaji tanü lanurtemi mapa meinyaki ita sen achitsü atema government mapa bushir. Aji oda, government nunga mapa dang nungibo mapa inyaker tenügang teimba kümogo aser government mapa mengura alima nung teinyaksüa kecha maka amato mobile dang amshia kidangmonger lanurtem aika kümogo. Iba tesayuba aser tangatetba nungi asenok pilatsüla aser tanübo pei teka agi mapa inyaka taküm lia aotsü atema kaketreju nung mapa ka mesüra kabosa sayutsüla aser angazüksüla. Atangji, ibaji tang tasenba tesayuba New Education Policy nungbo lir. Ajisüaka, government-i tanurtem dang item mapa inyaksü sayuyim metenzükaka, asenok yimeri mesüra kiyong aser mepusangertemi sarutepa danga mapa ishikabosa pei school nung sayudaktsütsü tenzüksüla. Aji oda, kidang light enokba (electrician), kidang paint yokba, tzü pipe yangluba (plumber) mapa, sü arürba, restaurant lapoktsü atema surochiok angazükba aser aluyimba mapatem amala angazüker mangazükma lir. Item mapatemji nisungtem anogo shia nüngdakba mapatem, anungji nüngdakji kodanga manentsü. Item mapatemji asen alidak tanurtem dang sayutsü atema government-sa ataa melii asenoki asenoksasa tenzüktetsüla. Tanü asen lima nung mapa mali masü, mapa inyak ashir mali, anungji mapa agi anünger masü saka mapa inyak ashir agi anünger. Aji oda, tanü nüngdakba tulutibaji tazüngba degree masü saka mapa inyak metetba nisung nüngdaker. Mapa tulu tila ta mali, pei jangraba aser pei dak alang inyaksü, anungji kar computer amshia inyaksü, karbo pliers aser wrench amshia inyaksü, karbo koterang, mertsüng aser alulem amshitsü aser karbo kioktsü amshitsü. Koba mapa inyakdir inyakaka, tongtibang aser tagitsüjibo nai inyakba mapaji nai pelashishia jungjunga inyaker asü meinyaker ta asübaji dang lir. Ibai ABCD angazükba putu masü, mapa inyaksü angazükba putu lir, anungji mapa inyaksü dang renemdi.

## OLEMSABANG

### Mapa tajung inyakra alima nung arishia junga alitsü

- L.Kika Pongener

Alima nung nisung ajaki arishia taküm junga linür, saka telinür ajakibo iba maongkaji monguteter, oda aika rongnung kar dang arishia taküm junga alir. Tsüngrem o-i ashir, "Kibuba dak amangang aser tajung inyakang; Aji sura na ali nung taso shia alitsü" (T.Ken-37:3). Tsüngrem o-i ashiba ama, mapa tajung inyakerter alima nung taso shizüka lidaktsütsü. Shirnoki mapa tajung inyaker, ochishia alir, asüngteta alir parnokji Tsüngremi chirnur, semchi-semnur tashi moatsütsü. Atangji, mapa tajung inyaker, ochishia, asüngteta, meshiteta alirtem arishi küm nung tain kümaka tenük, tepo, tenarong, tekolok, shisatsü ajak shidak alitsü aser chiyungtsü takü, tasen, tanang ajak shidak chiteta anema lidaktsütsü. Ano Tsüngrem o-i ashir, "Küpu apuba kolakji sentsüwangshi korang; Aji temeshiba taküm ajanga dang ajangzüker" (A.Shin-16:31). Tekolak nung küpu pua arishia alitsübaji odangbo malir, saka ibaji temeshiba taküm ajanga dang ajangzüker. Mapa tajung inyakerter, ochishia, asüngteta, meshiteta alirtemji, parnok dang taso shizüka alitsüba masü, parnok dak jakzükba chirnur, semchi-semnur dena tashitemeteter, kenshi-oshir, alimai züngshitsüsa lennir tajung, watsü-wabong tajung sotetdaktsütsü. "Kibuba tsüngken tsübuba nisung tepelatsü. Pa metsü alima nung tashi tulu alitsü. Azükaro aser rongsen par kidang alitsü" (T.Ken-112:1-4). Atangji, shirnoki mapa tajung inyaker, ochishia, asüngteta alir, parnokji tashitak tamajung kecha agia metongdaktsütsü, chiyungtsü sungolemba aser etsük-ontsü ka dang suaka, pangnang-pangnanga chiyunga-jema, koleni onur ilenjagi oteta, kechi inyaknur ajak inyakteta, tashi-ita arishia lidaktsütsü. Tsüngrem o-i ashir, "Parnoki ki sua yangji alitsü, parnoki tsükmenatsü lu ayimtsü aser item sungjang achitsü. Tangar alitsü ki parnoki meyanglutsü, tangar achitsü parnoki metsünutsü aser sungdong arishi anogo ama kü nubur arishi alitsü. Amajok nung parnoki mebelemtsü mesura tesamatsü asoshi chirnur mesotentsü, kechiyong parnok Kibubai moatsürtem kin lir" (Isaia-65:21-23). Shirnok Tsüngremi kü nubur ta shitetsüsa taküm junga liteter, parnokji yamaji moatsütsü. "Nisung shibai Kibuba tsüngken tsübur, shibai pa lenmang nung jajar pa temoatsü. Kechiyong ne ket agi züsentetba nai achitsü; Na tepelatsü alitsü aser ne den junga alitsü. Ne kinungtsüji tejang atangba tsükmenatsüdong ama alitsü; Ne chirtem ner langpang meketa olive sungdong ama alitsü" (T.Ken-128:1-3). Atangji shirnoki mapa tajung inyaka ochishia, asüngteta alir parnokji Tsüngremi yamaji moatsütsü.

Ajisüaka, alima nung mapa tajung ya tapu ana lir, mapa ka nisung tsüngdangbo tajung/shitak/ochi, saka Tsüngrem tsüngdangbo tesempatsü/meshidak/ochi masüba kar lir. Aiben asen mimchiri nisung tsüngdang shitak/ochi, saka Tsüngrem tsüngdangbo meshitak/ochi masüba, ibala mapa-jiang teimba inyaker. Alima nung asen mimchirtemi asen taginuba nukjidong kar ataloknudang, mesura mapa kar nung takok ngunudang, yimden bangdak aser lokti tashi (Power) amshia, tashiyim agi amokbanger akoktsü meranger, ajiser, ibaji nisung tsüngdangbo shitak/temeden amai bilemetsü akok, saka iba mapaji Tsüngrem tsüngdangbo temeden mangutsü. Aiben asen mimchiri tangar kar jenjang junga aliba raksatsütsü mechi nung, shitak agi meshitak kümtsür, tabensaba to mabensa kümtsür, ochiba-to tiyazü kümdaktsür atsüzüka yutsür, aser ibajagi alima nubur tsüngdangpo takok angutsü sudi...Ajisüaka Tsüngrem tsüngdangpo temeden mangutsü. Tsüngrem oi ashir..."Tamajunger linuk nungjagi leptoktsü; aser ashikülaker tera nungi atsütoktsü" (A.Shin-2:22). Atangji, shitak agi meshitak kümtsüba, tabensa agi mabensa kümtsüba, adoksar sernung madoksa kümtsüba aser ochi agi tiyazü kümtsüba dangji ashikülak mapa ta ajar...iba ama nisungji leptoktsü aser tera dena atsütoktsü ta Tsüngrem o jagi ashir. Alima aser nisung tsüngdang medenyongjia Tsüngrem tsüngdang memedentsü. "Nisung tsüngdang shitak mesukba lenmang ka lir; Saka iba tatempangji tasüba lenmang" (A. Shin-16:25).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir

# Sayutsüngir, Hans Schmidt temang tajungba küma Tenla kidangi ao



Sayutsüngir, Hans Schmidt hospital nung amongdang par kibong den tangokba noksa nung angur.

**January 31, 2024:** Yaküm Arizona nung aliba Victory Chapel First Phoenix nung outreach director aser lenmang nung sayutsüngia jajar, Hans Schmidt dak nisung kari injang khalokja yirutsüba sülen pa mapang talangka hospital nung mongogo.

Yaküm November ita nung pa lenmang nung sayutsüngiba mapang nung nisung kari pa dak tekolak nung injang khalokja liasü. Pa mekümsüki asütsüa akok, ta aikati bilema liasü, ajisüaka pa kanga junga anepba sülen tang mezüng Tenla kidangia ogo.

Amongnü pa kinüngtsüi, "Pai jajateter, o jembiteter aser drum-a atemer," ta metetdaksü.

Pa taneptsü anguba osang sangdonga pa kinüngtsü, Zulya

Schmidt-i Instagram ajanga pa menürema Tenla kidang drum atemdang tangokba noksa ka densema noksa kar lemsatep.

Laisa, "Asenoki sayatenya mapa inyakba Tsüngrem ka tenzüker. Pai (Schmidt) jajar, pai o jembir aser drum-a atemer. Tsüngremi Hans taküm nung sayatenya inyakogo aser anogo shia pa temang tajungba dang akümer. Maneni pa atema sarasademjang," ta lemsatep.

Victory Chapel First Phoenix Arogoia sangdong ka ajanga, "Tsüngremi sayatenya mapa inyakba atema onok pelar aser Pa nem tenüngsang agütsür. Hans hospital nungi kidangi oa par kibong den külemi lir. Pa maneni anepba mapang nung par kibong atema sarasademjang," ta lemsatep.

Yaküm November 15 nikonngang 6:15 ako meta arrshi küm 26, Hans Schmidt-i nisung longsoa senzüba tesem ka nung megaphone ka amshia sayutsüngiba mapang nung nisung kari pa dak injang khalokja liasü.

Tenük kuli alirtemi ashiba agibo, gari ka nung nisung kar arur Hans dang o tamajung shia süi aser lenmang nung sayutsüngia tesenzü, ta pa amokmerena liasü.

Hans aser pa kinüngtsü na tanur ana sosema lir. Tamalen pa sepai nunga liasü.

Hans'er kibong yaritsü atema GoFundMe campaign ka tenzüka liasü aser Mongolbar (January 30) tashi nung dollar sen 78,000 dak tema bendentetogo.

# Turkey nung Islamic State teloki Tenla ki ka amak; nisung ka asü

**January 30, 2024:** Turkey yimtiba, Istanbul nung Tenla ki ka amakbaji Islamic State kiralongrar teloki lir, ta parnok sasa nangzüko.

Istanbul kübok Buyukdere kiyong nung Santa Maria Arogo Tenla kidang mamangertem (Khristantem) adenshia alidang onoki amak, ta Ismalic State-i metetdaksü.

Amongnü Khristantemji tekülem sentong tagidak mapang nung kiralongrartem arua injang khaloktsü; iba tatalokba nung nisung ka asü aser aika yirua liasü.

Hombarnü Police-i nisung ana puogo; ka Russia nung aser ka Tajikistan nung lir, ta Turkey nung Interior Minister, Ali Yerlikaya-i metetdaksü.

Police-i tesem 30 mita aoba mapang nung melung melemi tamalen nisung 51 pua liasü.

"Nisung anapronglaji bendangertem lir. Ka Tajikistan nungi aser ka Russia nung lir. Tenaprongla Islamic State nung densema alitsüa akok," ta Minister-isa metetdaksü.

Yerlikaya-isa, Turkey

sorkari iba tatalokba sashia aitsür, ta metetdaksü.

Kiralongrartem Tenla ki amakdang khasetsang, arrshi küm 52, Tuncer Cihan-i kecha aibelena mali, ta Arogo atema lawyer Avsin Hatipoglu-i metetdaksü.

Arogoi kiyong nung security sepai tali lemzükjang ta mepishiogo.

Arogo lawyer-isa, Tenla ki amakdang asüsang Cihan ya Khristan-a masü saka Shia Islam lir; pa-a Khristantem den külemi tekülem sentong nungji liasü, ta metetdaksü.

Osang angazükba agi, Cihan ya Shia Muslim nung sükaka pai mapang shia Tenla kidangi aoer, aser Arogo nung putir-ia Chihan ya nisung tajung ka, ta kuli süogo.

Sorkar ketdangser Akif Cagatay Kilic-i, "Iba ama tatalokba ya asen linük nung memelatsü. Aibelenertemji tekeraba nung apuba sülen okadaki anir aotsü," ta metetdaksü.

Istanbul nung vicar, putir Massimiliano Palinuro-i, "Tenla kidang nisung ajak

sarasademba mapang nung Cihan kaset. Onoki tarutsü atema tsübur, kechiyong iba ya yimsü tsütsü maremsüktepba temaitsü ka lir. Iba ya temaitsü tamajung, anungji asenoki sarasadema lidi," ta metetdaksü.

Turkish bishops' conference-ia sangdong ka ajanga kiralongrartem Tenla ki amakba aitsüba den külemi linük nung tesempa malitsü atema sarasademang, ta ayongzüik.

Iba osang angashia Pope Francis-i X ajanga, "Istanbul nung aliba St. Mary Draperis Arogo den ni tesendaktep tajung lir. Kiralongrartem amakdang asür aser yirurtem atema ni mangyimba den tejashi lemsateper," ta metetdaksü.

Tang Turkey linük nung Khristan nütsüng 25,000 shi lir. Yaküm June ita nungi tenzüka tang tashi nung sorkari Islamic State den tesendaktep alitsü südi ta melung melemi nisung 2,086 pua liasü aser iba nungjagi nisung 529 bo tepuokdak lir.

# ANOGO ABEN TSÜNGREM DEN

## Tsüngrem yimlaba

*Ni samatsütsü masü atalokdaksütsü aru.*

*Mathi 5:17*

Yisu yimsüji tatem maka anung nung chiyongtsü auso dang nungi tali meimchiri ajangshiba tonga aoba lir. Atangji teti tatem maka tekümtetji pa taküm ajungmesodaksüba tiyongtsüji lir. Aji saka, ken atema kümzükbaji Pai aria bilemtsüba nung shilem ka lir. Aji asü nung Pa tesayuba nung tanelaren merükteta taküm yimya Tsüngrem yimli sensopur shia nung imlaba kuli teperi dena lir.

Yisui meimchir libaliro nung akanga soitba Temeshiba dang nung temeshiba ka asoshi aja. Tsüngrem den tesendaktep tashi itta alitsü asoshi iba tasen takangbaji nungdak ta Pai metetta liasü. Tsüngrem den tesendaktep tashi itta ali nung chichiba nütsüng kaji Khristan ka nungi yimlaba mapa tajungji inyaktetsü ain agi sünga alitsü.

Item ya shisadangang: Tsüngremi na nungi kechi yimlar ta nai bilemer? Nai na nungi kechi yimlar iba den medemdangang. Idakji tepela lir asü? Tsüngremi yimlaba ama nai malir ta nai angatetter asü? Ibaji atema nai kechi inyaksü ?

Sarasadem: Tamajungba nungi onok soitang. Matt. 6:13.

Tenangzüba: Kibubai na tamajung ajak nungi kümzüksü, Pai ne taküm anüksü.

# Madhya Pradesh nung Khristan putir ka bail nung chiokogo



Anil Mathew

**January 31, 2024:** Madhya Pradesh state nung Khristan putir kati tanurtem temeden anema inyakogo, ta tai tonglokja apuba sülen anogo 20 shi tepuokdak ayu, ajisüaka pa bail nung chikogo, ta Arogo lenirtemi metetdaksü.

Carmelite of Mary Immaculate (CMI) nungi putir, Anil Mathew ya Madhya Pradesh nung mission mapa inyaker. January 7 nü pa pua tepuokdak anogo 20 ayuba sülen January 28 nü bail nung chiokogo.

State yimtiba, Bhopal nung putir, Cyril Kuttianickal-i, local court kati Mathew nem bail agütsüba sülen chiokogo, ta metetdaksü.

January 29 nü osangbenertem den jembidang Kuttianickal-i, Mathew-i osangbenertem den jembitsü memelunger, ta metetdaksü.

Mathew ya Bhopal nung aliba Anchal Girls' Hostel nung

Director inyaker. Pai Juvenile Justice Act nung aliba ozüngtem alema children's home lapok aser tanurtem Khristan yimsü dangi meyipdaksütsü meranger, ta pa nem tai tonglokja liasü.

Court nung ken o jembidang Mathew atema ken o jembitsüri, Juvenile Justice Act kübok ken o mali, kechiyong pa inyakba hostel ji Juvenile Justice Act nung shia aliba ama 'juvenile home' masü, ta metetdakja liasü.

Ken o jembitsürisa, Mathew inyakbaji children's home masü saka hostel lir, aser yangji aliba tanur ajakji parnok tsüraburtemi Arogo dang mepishia yokba lir, ta court nem metetdaksü.

Iba hostel ya school education department nung register süa lir, ta paisa shisem. Nütsüng million 72 aliba state nung ya nütsüng shilem 0.29 dak Khristantem lir.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Shisaren**

(n) shisatsü renloktsü sayubaren (Philosophy)  
\* Shisaren nung temulung agütsüba ajanga tangatetba angur.

**Shisashir**

(n) shisatsü aser kaket ken o aroka bushir (researcher)  
\* Tanü asüng shisashir aika adokdagi.

**OLONG PAITEP # 6684**

1		2				3		4		5
				6						
		7		8						
9						10			11	12
			13			14	15			
16						17			18	
						19		20		
21		22								23
24										

**TIPIEN**

- 1. Saku - (4)
- 6. Songjen - (7)
- 7. Mali/Tazüng - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzünglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüng kasa jatepba - (7)
- 25. Ki yangluba oset - (4)

**LANGTSÜNGLEN**

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüngdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. \_\_\_ tatsü - (3)
- 12. Tebur kidong aser zünga kasa tsüngda jatepba - (4)
- 14. Pela agizükba tapu ka - (5)
- 15. Tenüng atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

**OLONG PAITEP # 6683 TELANGZÜBA**

**TIPIEN :**

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso,

**LANGTSÜNGLEN :**

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüngdak, 10. Yongya,
- 11. Kongro, 13. Ora, 14. Ata.

**NAI-A YA METETTER MA**



Arishi küm 65 tain Johor Sultan Ibrahim Iskandar-i January 31, 2024 nü Malaysia chuba menden nung menogo. Sultan Ibrahim ket nung rongsen \$5.7 billion shi lir aser Kuala Lumpur nung aliba national palace nung pai tezüngzüktep agiogo.

Muslim nunger teimba ser aliba linük nung pa Islam indang official head aser armed forces nung commander-in-chief inyaktü. Sultan Ibrahim ya Malay-British nungi jakzükba lir aser tashitait Johor royal family nungi lir.

Sultan Ibrahim-i real estate aser mining nungi telecommunications aser palm oil shishilembar aser par official residence Istana Bukit Serene ajanga par kibong rongsen kuli sayur.

Sultan Ibrahim indang luxury cars 300 tema lir aser gari kabo Adolf Hitler-i agütsüba ta ashir. Maneni Boeing 737 ka dena par nija tayimtsü aika lir aser par kibong indang 'private army' ka lir.

**Assam CM-i Gadkari den Guwahati Ring Road Project atema jemb**



**Guwahati, January 31, 2024** New Delhi nung Union Minister (Agencies): Assam Chief for Road Transport and Minister Himanta Biswa Sarma-i Highways Nitin Gadkari den

ajurutepogo. Iba mapang tenati Assam nung infrastructure projects inyaktü jembitep.

Union Minister den Guwahati Ring Road atema jembiba den tanga mapatong aika indang lemsatepogo, ta CM Sarma-i ashi.

Iba mapang Union Minister Gadkari-i pa nem shisatsü aika agütsü ta Sarma-isa shisem.

"Ni Delhi nung tatsüka amongdang Union Minister Nitin Gadkari den Guwahati Ring Road aser tanga mapatongtem lemsatepogo" ta CM Sarma-i ashi.

Guwahati Ring Road ya kanga tongtipang lir aser iba ajanga urban traffic khuret ajemtsü aser Northeast nung Guwahati renloktsü.

**Arunachal nung Congress & NPP züngsemtemi BJP nung aden**

**Itanagar, January 31, 2024**

(Agencies): Arunachal Pradesh nung NPP aser Congress atema tetsükdaksü ajuruogo aser ibaji züngsem aika Bharatiya Janata Party (BJP) nung adenba lir.

Arunachal Pradesh assembly elections matongdang Papum Pare nung iba ya atalokogo.

Papum Pare district kübok Dungshi village nung National

People's Party (NPP) aser Congress züngsem aika BJP nung aden.

Iba sentong nung Papum Papre District BJP president Ngurang Logi Nabam Setej, Techi Dhormo GPM Basernnallo aser BJP Karyakarta Panchayat Leaders o public aden.

Idangji local MLA Tana Hali Tara-i züngsem tasen ajak

pelashishia agizük.

Congress aser NPP workers aika BJP nung adenba ya CM Pema Khandu aser PM Modi ajanga terenlok bener aruba ajanga lir ta MLA Tara-i ashi.

"Parnoki BJP yaritsü aser CM Khandu nungittsü nangzükogo. Taruba election nung onok MP tem takok ngudaktsütsü atema parnoki nangzükogo" ta Tara-isa ashi.

**Tai Ahom nungeri Me-Dam-Me-Phi benjung among**

**Guwahati, January 31, 2024**

(Agencies): Bodbarnü Assam kübok tesem balala nung Tai Ahom nungeri Me-Dam-Me-Phi temeshi benjung mongogo.

Me-Dam-Me-Phi ya Ahom nunger indang tongtipang

benjung ka lir aser kümshia January 31 nü amonger.

Me - D a m - M e - P h i benjung nung Ahom nungeri parnok tebou

nunger aser tsüngremtem nem tetushi agütsür.

Me-Dam-Me-Phi ya tamangba yimsü benjung ka

dang masü saka sobaliba benjungmong ka lir kechiyong iba ajanga Ahom nunger tsüngda telongjem, adianu aser tangatettep adokdaksür.

**Mizo kaketshirtemi PM & Home Minister poster rongdoktsü**



**Aizawl, January 31, 2024**

(Agencies): Mizoram kaketshir telok tongtuba Mizo Zirlai Pawl-i Prime Minister Narendra Modi aser Union Home Minister Amit Shah indang posters rongdoka lungkak ait.

Centre sorkari Free Movement Regime (FMR) agientsüba aser Indo-Myanmar arrtsü atsüdagtsüba lemtet anema MZP-i lungkak ait.

Mizo kintem ya India, Myanmar, Bangladesh aser India kübok state aika nung prokshia lir. British nungeri masüngdangtepi Mizo nunger

lemsatsü aser Mizo nungeri item arrtsü ya kodanga magizük.

Centre sorkari FMR agientsü aser arrtsü atsüdagtsü lemtetba ya kin o kin piladaktsüba lir aser India sorkari iba lemtet agiba atema sasa bilemstür, ta MZP-i metetdaksü.

2007 United Nations Declaration on the Rights of Indigenous Peoples (UNDRIP) nung Article 36 nung international borders ajanga lemdangba lisopurtem sensaksemstü aser tesentaktep ahangshitsü indang lateta lir. Anungji ketdangpurtemi

lisopurtem den asüngdangyatsüla ta parnoki ashi.

MZP-isa centre sorkar dang ozüng alema drugs aser osettem shibelenba azüoktsü atema tanga lenmangtem bushitsü ayongzükogo.

MZP-isa Mizoram Chief Minister Lalduhoma aser Home Minister Sapdanga na den ajuruteper mapa inyaktü mepishio.

Parnokisa Prime Minister Narendra Modi dangi memorandum ka zülu aser ibaji Union Home Minister Amit Shah, Vice President aser Union Home Secretary nunger dangia züluogo.

# Kiralongrartem mechioktsü, onoka mainshitsü: Israel PM



**Jerusalem, Aenjeti/January 31 (Agencies):** Indang-indanga mesüi ceasefire asoshi jembishinüba mapang Hamas teloki tongtipang takhangba ana agütsüba Israel Ato Kilonser Benjamin Netanyahu-i magizük aser par linüki Gaza Strip nungia mainshitsü mesüira Palestine nunger telungpur meyirijang aika tepuokdak yua aliba ya mechioktsü ta ashi.

West Bank nung Mongulbarnü sentong ka alidang Netanyahu-i ano maneni Hamas madak takok jungjunga mangu tashi rara matemtsü ta nangzükshi. "Gaza Strip nungi IDF anizüker maotsü aser kiralongrar meyirijang aika pua aliba mechioktsü. Ana ka kata mataloktsü. Kechi ataloktsü?

Takokba ajak!" ta ato kilonser indang office ajanga Hombarnü sangdong ka nung ashi.

"Tezüngzüktep balala indang jembiba ni angashir. Ni ya nisung ajak nem jangja angatetdaksüner: Nükjidong ajak nung takok mangu tashi iba rara matemtsü. Tetetzü Hamas samatsütsü, asen nisung pua alirtem ajak anir arutsü aser Gaza ya kodanga Israel asoshi tebilemstü mesüidaksütsü," ta Netanyahu-i ashi.

"Ni itemji asoshi bendanga agütsür inyaker. Asen sepaitem yangji bendanga agütsür inyaker aser jangratemtsüka nübur timba yangji nokdaka lir. Takok anguba dak alaka asenoki kecha nunga atsüanem makatsü," ta pai ashi.

West Bank nung aliba mozüki ka meita aodang Israel sepaitemi Palestinte nunger telungpur asem tepsetba sülen iba sangdong ya agütsü.

Sepaitem Hombarnep Jenin yimti nung aliba Ibn Sina mozüki telungi ai aser nisung asem khaset ta Israel mitkari ashi, koba Hamas-i par telok züngsem lir ta tenüng agia liasü. Parnok ya iba mozüki nung jenoka liasü aser parnoki lendong agütsütsü sentong yanglua liasü ta mitkari ashir.

Israel sepaitemi mozüki telung nung injang khaloktsü, ta Palestinian Health Ministry ajanga ashi aser mozüki nung Israel nungeri iba ama operation agiba anendaksütsü asoshi ajungshitsü alima dang ayongzuka liasü. Israel-i Gaza nung Hamas anema raraba nung Palestine nunger nisung 26,000 dak tema tepsetogo, ta Hamas-i yimsü asüba territory nung Health Ministry ajanga ashir.

Ministry ajanga civilian aser rarartem asüba melemdanger. October 7 nü Hamas teloki Israel south tsütsü amakdang nisung 1,200 tepset aser 250 shi pua bener ao.

# MULUNGEN O



ASO : 1923

ASÜ : 18.01.2024

Onoki teti meima aliba ojala Lt. **Temjeninla** (Chuchuyimlang) la arishi talangka Tsügremit moaja aru asünungji la tantsür süa taküm alidang aser ano la tasü nü tashi, shirnokisa sarasadem den alirongsen, nübu, shisatsü agi ozü den yaritepogo nenok ajak dang iba osang kaket ajanga pelaba lemsateper. Tulusang Tsügremit nenok ajak taluposa moajangma.

*Temiem Chirnur, Semchirtem, & Kinungertem.*

# Myanmar anti-coup force temi general tem maktoktsü ana nung lir: NUG

**Yangon, Aenjeti/January 31 (Agencies):** Myanmar nung anti-coup force temi ashiba agi, parnoki general tem maktoktsü ana nung lir. Taoba küm October tatemlen nungi military anema jenjang agiba takok ngua aoba ajanga item teloktem tali ajungmesor lir. General tem yagi küm asem tejakdang civilian sorkar atsüngtoka liasü.

Myanmar kübok mejangjaba tesem ka nungi online forum ka nung jembiba mapang NUG Acting President Duwa Lashi La-i ashiba agi, resistance fighter tem aser telungpur teloktem longjemer taoba küm Operation 1027 tenzükba sülen anti-coup force temi takok nguyonga odar.

"Küm asem sülen Spring Revolution ya tang tashi taitba lir," ta Duwa Lashi La-i Mongolbarnü ashi. "Anogo ka nungi anogo ka ta onok takok dangi odar. Ozüng alema inyaksangshiba military-i kodanga nüburtem tejangraba remsepa metoktsütettsü."

NUG nung nüburtemi election ajanga shimba yimden yimsüsürtem, shirnok 2021 küm coup sülen atsügtok aser military-i yimjung nung longkak aiterrem dak tashiyim amshiba sülen civilian temi tentetba Peoples' Defence Force (PDF) amenoka liasü parnok densema lir.

Duwa Lashi La-isa military ya lenla ajunga nung sentoka arudar, koba junta atema maksü tulu lir, ta ashi.

Military anema nokdaksa teloktemi linük kübok tesem

aika azüoka arudar aser parnoki military outpost aser jila aika atsüngogo. Nüburtemi shimba Aung San Suu Kyi-i aniba sorkar atsüngtokba sülen general tem tang tetsükdaksü tulutiba ajangshia arudar.

Military-i ashiba agi, parnok anema raratem ya kiralongrartem lir aser military-i tamakok anguba aser military toktsüba indang osang adokba ya teyazü lir aser military tenüng menüksütsü atema sangdongbatem lir.

Local monitoring group, Assistance Association for Political Prisoners-i ashiba agi, military-i srokar atsüngba sülen civilian 4,468 tepsetogo aser yimden yimsüsüba dak sendakba nung nisung 20,000 dak tema pua yuogo.

United Nations aser human rights teloktemi, meimchir temeden anema jenjang agiba asoshi general tem aitsüogo, kong opposition azüoktsü merangba mapang humanity anema inyaksangshiba densema lir.

UN High Commissioner for Human Rights Volker Turk-i ashiba agi, Myanmar nung military-i civilian tem, medical facility tem aser school tem mapangshia maka meimchir temeden dak sendakba nung tensa kanga mejungi küma odar. Alima-i tensa ya kangabo süoki ia magir, ta paisa shisem.

"Alima nung tesem balala nung mepetmesü adokba mapang ajak bilemtettsü kanga tongtibang," ta Turk-i Mongolbarnü ashi. "Myanmar

nung aliba nüburtem kanga talangka kangshia arudar. Raraba tesem nung military tamakok anguba shia parnoki tayimtsü aser artillery amshia tesem aika maka arudar," ta pai ashi.

Military-i yimtsüng karbo ajunga rongtoktsüogo aser tayimtsü aser anüng nung ayimba hadir balala amshia tesem balala maka arudar.

Bodhbarnü Amnesty International aser Human Rights Watch densema lokti tentet balalai Myanmar military nem jet totzü magütsütsü asoshi ayongzükogo.

"Junta-i rara dang benokba ozüngtem anema inyaksangshiba tashi tajemba kümdaksütsü atema sorkartemi jenjang taliba agitsüla," ta Asia director at Human Rights Watch Elaine Pearson-i ashi. "United Nations züngsemtemi UN Security Council dang Myanmar nem prangbong injang aser hadir balala dak sendakba nung tenokdangba agütsütsü asoshi mepeshitsüla, kong ozüng alema tayimtsü amshia civilian tem amakba nokdaksü asoshi military nem jet fuel magütsükdaksütsüba densema lir," ta paisa shisem.

Amnesty-i ashiba agi, shipping satellite asadanga sülen 2023 trade aser customs data ajanga küm ishika tsüngda European Union, United Kingdom, United States aser tanga linüktemi tenokdangba agütsüba sülen aviation fuel Myanmar-i aitba lenmang kanga melenshiogo.

Office of the **WATSÜ UNIT CHUCHUYIMLANG**  
 P.O. Chuchuyimlang - 798614  
 Mokokchung : Nagaland  
 Email : chuchuwa123@gmail.com

**TENÜNGSANG AGÜTSÜR**

75 buba Indian Republic Day amungba anogo nung asen senso tajung watsü **Dr. Sentitula IFS**, DFO Mokokchung, W/o. Mr. Bendangonen Jamir **Governor's Gold Medal** konang anguba asoshi Watsü Unit Chuchuyimlang-i tenüngsang tulu agütsür. Maneni Tsüngremi ne wadang tali azükarua moajangma.

**Sd/-**  
**Wt. S. Bendanginla**  
 President, WUC

**Sd/-**  
**Wt. Temsuyangla**  
 Secretary, WUC

# Imran Khan aser pa kinungtsü tepuokdak küm 14 ayutsü

**Islamabad, Aenjeti/January 31 (Agencies):** Imran Khan aser pa kinungtsü Bushra Bibi na tepuokdak küm 14 ayutsü obendang agütsüogo, koba Pakistan indang taoba ato kilonser nem anogo ana tsüngta temerenshi tanabuba agütsür alitsü.

Iba linük nung election agitsü hopta ka shi lia temerenshi ana ya agütsür, kong pa metokteptsü tenokdangba agüja lir.

2022 küm pa den tokteper temi ato kilonser menden nungi atsüngdoksang, Khan ya ochimashi ken o nung küm asem tepuopkdak ayutsü obendang agütsüba ama tepuokdak lir.

Pa anema ken o balala benokba ya yimtenren tsütsü pa dak tenük yokba nungi lir ta pai ashir.

Bodhbarnü jembiba ken o ya pa ato kilonser inyakba mapang linük balala sorkari sempet agütsüba tenati agizükba indang lir aser Mongulbarnü jembiba ken o ya 'classified state documents' temai adoktsüba atema lir aser iba ken o nunga pa tepuokdak küm ter ayutsü obendang

agütsü. Obendang ana nung agütsüba temerenshi ya mapang kasa nung agütsütsü akok ta amanger, saka tejangjabo masü.

Court ajanga tena dang sen 1.5 billion rupees (\$5.3 million) shi menoktsü totuyuba agütsü.

Khan'er Pakistan Tehreek-e-Insaf (PTI) party-ia iba temerenshi ya ajanga parnok lenir ya tarutsü nung yimtenren mapa nungi tenokdangba agütsür ta ashi.

Khan indang okatsür temi ken o anaprong Pakistan indang High Court nung maneni jembitsü asoshi mepishitsü ta shiogo.

Taoba mapang ato kilonser inyaksang aser cricket asayar tejen ya August ita nungi tepuokdak yua lir aser pa timba Rawalpindi nung aliba Adiala jail nung ayur.

Pa kinungtsü Bushra Bibi, shiba tepuokdakbo meliasü, la Bodhbarnü tepuokdaki aru. Khan ato kilonser inyakba mapanga la bo yimjak nung kangabo temai adoka meliasü. Imran Khan ato kilonser akumtsü ita ishika lia tena 2018 küm kibong akum.

*(Maneni tapak 8 nung...)*

### Col. CK Nayudu Trophy: Nagaland U-23-i run 299 agi Manipur kokogo



**Dimapur, Aenjeti/January 31 (TYO):** Tanga asaya aliba Col. CK Nayudu Trophy nung Nagaland U-23 team aser Manipur U-23 team na asaya Nagaland-i run 299 agi kokogo. Asaya nung toss koka mezüing batting amentsü shimba sülen Nagaland team nungi batter tem maneni kanga junga asaya aser parnok rongnungi captain Hem-i ball 237 nung run 114 yanglua liasü. Mughavi Sumi-ia run 59 yanglua Nagaland team nem teyari agütsü aser parnoki mezüingbuba innings nung over 95.4 nung asayar ajak out sür run 284 yanglua liasü. Manipur team atema

Romario aser Kiran Laishram nati wicket pezüzü agia liasü. Manipur team mezüingbuba innings nung run 189 dang yanglur asayar ajak out süadok. Nagaland team nungi Neizekho aser Hem nati wicket 5 aser 4 agia Manipur nungi batter tem over 60.2 nung ajak out süja liasü. Manipur team nung batter tem rongnungi captain Ulenyai Khwairakpam-i dang junga asaya-a pai ball 130 nung run 86 yanglua liasü. 2buba innings nung Nagaland team-i asayar ajak out sür over 96 nung run 365 yanglu liasü. Parnok rongnungi Mughavi Sumi aser Sujal Prasad nati kanga junga asaya. Asaya nung

Mughavi-i ball 219 nung run 101 yanglu aser Sujal Prasad-i ball 74 nung run 111 yanglua liasü. Manipur team nungi Kiran Laishram-i ball tajungba onteta pai wicket 5 agi. Asaya akoktsü atema run 416 nungdaka 2buba innings tenzük ajisüaka parnoki over 86.3 nung asayar ajak out sür run 161 dang yangluteta liasü. Nagaland team atema Tohuka-i wicket 5 agia liasü. Manipur U-23 atema Suresh-i dang tera junga asaya aser pai run 49 yanglua liasü. Nagaland team taruba asaya meghalaya den February 4 nungi 7 tashi MCA Ground, Polo Ground, Shillong nung asayatsü.

### National Open Race Walking: Manju-i 10km asaya nung gold angu



**Aenjeti/January 31, 2024 (Agencies):** Punjab tsür international race walker, Manju Rani-i, 11buba National Open Race Walking Competition nung kanga junga asayaogo. Tetsür 20km tetoktepba nung gold medal anguba sülen anogo ka lir lai Bodhbarnüa 10km nung gold medal nguogo aser 2024 Paris Olympic Games nung asayatsü lenmang tesadamba lapokogo. Paris nung taküm mezüingbuba marathon race walking mixed relay asayatsü lir. Arishi küm 24 tain Manju-i 10km asaya nung alizüing 45:20.00 nung tongteta gold medal ngua liasü. Hangzhou Asian Games nunga lai Ram Babu den 35km mixed relay race walking team event nung bronze medal ngua liasü. Gold medal ana tashi anguba

sülen Manju-i, "kü nükjidongji taküm mixed relay event nung India tenüing nungi Olympics nung asayatsü atema lir," ta ashi. Taküm April 20 aser 21 nü Antalya, Turkey nung asayatsü aliba Athletics Race Walk Team Championships atema national team asoshi asayartem shimtsü asoshi Athletics Federation of India (AFI)-i senior 10km race walk ya bendenloka liasü. Turkey nung asayaba mapang top 22 team Olympic Games atema qualify süatoktsü. Turkey nung asayamung atema team shimtsü asoshi tatembangbuba trail ji March ita agütsü. Tebur 10km event nung Punjab nungi asayar Sahil-i asayar tejentem aika ajateta gold medal angu. Pai alizüing 39:25.00 nung tongteta liasü.

Mongolbarnü tebur 20km race walk nung pa pongbuba nung liasü. Iba asaya nung Uttarakhand nungi Paramjeet Singh Bisht-i alizüing 39:36.00 nung tongteta silver angu aser Delhi nungi Asian bronze medalist Vikash Singh-i (39:47.00) bronze medal ngua liasü. Kasa mapang nung Goa nungi Vijay Omark Vishwakaram-i alizüing 2:39:19.00 nung tongteta tebur 35 km race akok aser tetsür 35km asaya nung Uttar Pradesh nungi Bandana Patel-i alizüing 3:11:06.00 nung tongteta gold medal ngua liasü. **Takokertem:** Sahil (Punjab) 39:25.00, Paramjeet Singh Bisht (Uttarakhand) 39:36.00, Vikash Singh (Delhi) 39:47.00 35km: Vijay Omark Vishwakaram (Goa) 2:39:19.00, Sagar Satish Chandra (Gujarat) 2:44:22.00, Devender Singh (Haryana) 2:44:58.00. Tetsür: 10km: Manju Rani (Punjab) 45:20.00, Payal (Uttarakhand) 46:04.00, Mokavi Muthurathinam (Tamil Nadu) 46:10.00. 35km: Bandana Patel (Uttar Pradesh) 3:11:06.00, Pooja Kumari (Punjab) 3:17:51.00, Komal (Haryana) 3:23:06.00.

### Imran Khan aser pa kinungtsü...

Linük nem agütsüba sempet tem tena ajangzüktsü mechi ayok mesüra tenati ayu ta Pakistan indang anti-curroption watchdog ajanga tai tongloksüba tenati khenyongi magizüker. Item sempet rongnung Saudi Arabia

indang Crown Prince ajanga agütsüba jewellery densema lir. Khan anema benokba ken o ya shidak masü aser ken o kanga arsanga jembir, aser asen judicial system puti otsü nung tejashitsü anogo ka lir, ta aitsü.

(Tapak 7 nungi...)

Khan indang okatsürtemi par temeden jembitsü mapang magütsu ta shiogo aser Khan, Bibi mesüra par legal team nungi shinga malidang obendang ya zünga ashi, ta osang kar ajanga ashir.

### Olympic atema Kohima DC-i senden ayong

**Dimapur, Aenjeti/January 31 (Agencies):** Deputy Commissioner Kohima, Kumar Ramnikant, IAS-i sangdong ka 2024 dak sendakba nung ken o balala sensak asemtsü asoshi February 2 nü 1:00 ako nungi tenzüka DC indang Office Chamber nung senden ka

amentsü ta metetdaksüogo. Iba senden nung Kohima District Sports Council züingsemtem, Chef-de-Mission, Deputy Chef-de-Mission aser asaya balala lokti tentet tir temi shilem agütsü. Ken o dak sendaka alirtem ajak iba senden nung tamakok maludaktsüi arua shilem agütsü DC-isa metetdaksüogo.

### Mokokchung AutoX & Up Hill Climb 2024 tetoktepba tembangogo



Tongti tesemdanger den takokertem aser tayongertem noksa nung angur.

**Süingratsü, Jan. 31, 2024 :** Adventure and Motorsports Association Mokokchung (AMAM)-i ayongba 7 buba gari asemtep tetoktepba Mokokchung AutoX & Up Hill Climb 2024 sentong Jan 30 & 31 anogo ananü Süingratsü sports complex aser Mokokchung yim lushi kübok Meraküm Tzüin Resort nung kaogo. Anogo ana sentong nungji state asem (3) - Nagaland, Assam aser Meghalaya nungi kija aser telok balala meyonga parnok 44-i shilem agia liasü. Takoker nem senpet sen den trophy aser certificate agütsüba sentong nung BJP YUVA Mokokchung district Tir, Imtikümzük Imsong tongti tesemdanger liasü. Anogo ananü senteper parnoki aahetba points ajak meyokteper takokertemji yamai lir;

**1. BELOW 1300CC:** Champion : KIMA JAMIR (SPEARHEAD) 1st runner-up : THEZIEU KIRE ( Nagaland 4x4 Kohima) 2nd runner-up : ALEM I. JAMIR (AMAM) **2. OPEN CATEGORY:** Champion : THEZIEU KIRE (Nagaland 4x4 Kohima) 1st runner-up : HOKAVI KIBA (Team RD Dimapur) 2nd runner-up : TOMITO SHOHE (Street King Club Dimapur) **3. SUV:** Champion : AMONG JAMIR (SPEARHEAD) 1st runner-up : KAMLISH DAS (MASAM) 2nd runner-up : L A N U S U N E P (SPEARHEAD). **4.OVERALL CHAMPION:** THEZIEU KIRE (Nagaland 4x4 Kohima).

### India den mezüingbuba Test atema England team sangdongogo

**Aenjeti/January 31, 2024 (Agencies):** England team züingoksemogo. Taoba küm Australia den Oval nung tatembangbuba test nung shilem magiba sülen parnok ajak maneni Test asaya atema England team nung züingoksemogo. Iba asayamung nung England team ya Ben Stokes lenisüba nung asayatsü. Mezüingbuba Test asaya atema England team nung asayartem: Zak Crawley, Ben Duckett, Ollie Pope, Joe Root, Jonny Bairstow, Ben Stokes (c), Ben Foakes, Rehan Ahmed aser Jack Leach nungera Hartley, Mark Wood, Jack Leach.

Team nung spinner pezü aser seamer ka densem lir. Kasa mapang nung Lancashire nungi left-arm spinner Tom Hartley tang mezüingbuba Test asaya ka nung asayatsü atema renema lir. Team nung Ollie Pope, Ben Foakes, Rehan Ahmed aser Jack Leach nungera Hartley, Mark Wood, Jack Leach.

**BILEMDANGANG**  
"Kong temerangdangba lir idakji takok lir."